

宴後令三公及該司議之可也○臺諫啓金自修事不允○以成雲爲
兵曹叅判尹仁鏡爲禮曹叅議俞汝霖爲全羅道觀察使○夜西方有
氣如火○已未備邊司堂上安潤德洪淑韓亨先啓曰臣等昨聞平安
道虞候李長吉入閤延遇賊之事深以為驚及見兵使書狀則云李長
吉入歸時先遣斥候知虜人伏兵先據險而戰得以不敗又焚其禾穀
到深江而還兵使又率援兵二百入歸其所為之事似不差跌矣然其
措置之事當豫為之但三屯驅逐時多有斬獲今又斬三級焚其禾穀
彼必含怨思有以報復於我邊事當益加措置且此舉非邊將所自爲也
前日廟筭已定故兵曹催促入送者且此啓本必兵使得報即啓者也
想從後詳悉更啓待啓本入來而兵曹與備邊司共議為公事何如傳
曰知道○上御勤政殿接見大內殿使臣仁叔西堂等賜物有差○領
議政南袞右議政權鈞禮曹判書尹殷輔叅判成雲叅議尹仁鏡詣賓
廳議平安監司馳啓之事以啓曰臣等以為必無如此之事也兵官
脫或出來而招義州官則當答曰若赴京者則可以入歸也不然則擅
越關津於我國有法條不可進去云此事請令該司為公事行移何如
設使州官得與兵官相見唐人來居于湯站之事州官不可禁也且